

Mál nr 17/2015

Ár 2016, þriðjudaginn 29. mars var haldinn fundur í siðanefnd HRFÍ.

Fyrir var tekið mál nr. 17/2015

X

gegn

Y

og kveðinn upp svohljóðandi úrskurður:

I. Málsmeðferð siðanefndar.

Í erindi kæranda (HRFÍ) sem barst siðanefnd 25. ágúst 2015 er farið fram á úrskurð siðanefndar vegna þess að kærða (Y) hafi gerst brotleg við grundvallarreglur fyrir félagsmenn í HRFÍ með því að para tíkina Z við rakkann V án þess að tíkin væri með gilt augnvottorð við pörun. Kæran var send kærðu til umsagnar með bréfi dagsettu 20. Janúar 2016 og henni gefinn frestur 17. febrúar til að skila inn andmælum. Ekki barst svar innan tilskilins frests og var kærðu send ítrekun dags 23. Febrúar 2016 þar sem gefinn var viðbótarfrestur til 1.mars. Kærða sinnti ekki ítrekuðum tilmælum og reyndi á engan hátt að koma með andsvör eða útskýringar á meintu broti. Ákvað siðanefnd því að taka málið til úrskurðar

II. Helstu málsatvik og ágreiningsefni.

Samkvæmt innsendu pörunarvottorði dagsettu 2. ágúst 2015 var tíkin Z pöruð við rakkann V hinn 9. apríl 2015 án þess að tíkin hefði gilt augnvottorð við pörun. Hundarnir eru af hundakyninu Dvergschnauzer og er tíkin í eigu kærðu. Kærandi telur að með pöruninni hafi kærða gerst brotleg við grundvallarreglur fyrir félagsmenn í HRFÍ. Kærða hefur ekki nýtt sér andmælafrést sinn þrátt fyrir ítrekun né á neinn hátt reynt að halda uppi vörnum í málinu. Siðanefnd ákvað því að taka málið til úrskurðar sem byggt myndi á fyrirliðgjandi gögnum frá skrifstofu HRFÍ.

III. Forsendur.

Samkvæmt grundvallarreglum fyrir félagsmenn í HRFÍ skulu félagsmenn er nota hunda sína til ræktunar vera trúir ræktunarstefnu HRFÍ og vera vel að sér um það ræktunarmarkmið sem gildir fyrir viðkomandi hundakyn og í reglugerð um skráningu í ættbók, reglur sérdeilda varðandi undaneldisdýr segir um hundakynið Dvergschnauzer:

„Augnvottorð: Vottorð má ekki vera eldra en 12 mánaða við pörun (Gildir frá 1.mars 2007). Vottorð má ekki vera eldra en 18 mánaða við pörun. (Gildir frá 20.01.2010) Greinist hundur með staðfesta arfgenga starblindu (cataract) skal hann skráður í ræktunarbann. (Gildir frá 1. apríl 2011). Greinist hundur með arfgenga vaxandi sjónurýrnun (PRA) fást hvolpar undan honum ekki ættbókarfærðir. Hundurinn, foreldrar og afkvæmi hans eru sett í ræktunarbann. (Gildir frá 01.09.2012).

Óumdeilt er að á þeim tíma sem pörunin átti sér stað var tíkin ekki með gilt augnvottorð. Augnvottorðið er eitt þeirra vottorða sem áskilin eru um heilsufarsskoðun hundakynsins og mikilvægt að það liggi fyrir við pörun til þess að tryggt sé að hundurinn beri ekki með sér arfgengan augnsjúkdóm. Tíkin var augnskoðuð í júní 2015 og til allra heilla stóðst hún skoðun. Það breytir þó ekki brotinu að hún hafi staðist skoðun eftirá, það var ekki fyrir séð.

Við mat á viðurlögum er tillit tekið til þess að kærða hefur ekki áður svo vitað sé gerst brotleg við reglur félagsins.

#### IV. Niðurstaða.

Kærða, Y telst hafa gerst brotleg við grein 2.6 í grundvallarreglum fyrir félagsmenn í HRFÍ.

Kærða er áminnt.

f.h. siðanefndar

---

Anna María Flygenring

---

Guðríður Þorbjörg Valgeirsdóttir

---

Kristín Sveinbjarnardóttir